

四庫全書

集部

欽定四庫全書

鄮溪集卷二十五

宋 鄭獬 撰

七言古詩

春日

樹頭啼鳥喚眠覺
無數柳綿飛入袍
亂花遶屋水光動
碧虹漏窻春日高
乳雀趁飛玉蛺蝶
嬌鵲啄落金櫻桃
倚欄正欲破閒悶
聽得酒聲鳴小槽

二月雪

戊戌二月二十六忽見大雪漫空來長老驚嘆共相語
非時有雪誠怪哉陽文四畫已出地至今百蟄不聞雷
怪得氣候斗暄暖便疑赤帝來相排黑風倏起捲滄海
白日黯黯如煙煤湏臾大電雜猛雨滿地走近瓊與瑰
陰氣蓄怒固未已即時飛雪相傾頽青靈何處避威侮
蒼鳳停車寒毳毳天地萬物失光彩草樹僵凍成枯茇
凌暴春工太酷烈似恨百花先時開隱公三月亦雨雪
仲尼春秋書為灾是時魯國行謬政天心可用人理推

我疑此雪不虛應必有沴氣戕栽培去年六月已大水
居人萬類生魚鰓當時夏稅不得免至今里正排門催
農夫出田掘野薺餓倒只向田中埋方春鳥獸尚有禁
不許彈獵傷胚胎而况吾民戴君后上官不肯一掛懷
豈無愁苦動天地所以當春陰氣乖只消黃紙一幅詔
敕責長吏湏矜哀蠲除餘租不盡收取提赤子蘇饑骸
沛然德澤滿天下坐中可使春風回

通州雨夜寄孫中叔

黑雨噴薄陰雲驅昏林號風秋聲颯颯海氣熏煮怒不泄
彭彭十月推雷車濕衣憫默瞠無睡起對樽酒誰為娛
此心豈復有雙羽一夜飛去不可拘昔與子同入京師
借屋共寄西城廬愛我議論有可採攜草就我誇染濡
鍊出五色補天漏拈筆蘸墨縱橫塗子云朋友當如是
脫然意快如獰駒京師天子之所宅樓殿堆疊騎天衢
九光流碧滑欲走綃畫顛倒橫相舁東風薰濃一千里
黃蜂胡蝶飛遽遽高樓張旗鬪煮酒沉香滿榼金真珠

玉盆一飲醉不醒落花滿衫行相扶未幾子去遊西洛
嗟我出門獨騎驢晚落塵埃兩袖淚望子不見風吹裾
三月殿前試不中青冥失計遊五湖撫劍東南看滄海
大江正值秋風初我疑海神怒天熱直欲上薄東日烏
乾坤頓撼壯人意揭竿便欲尋狂奴九月歸來已霜蚤
肥膏紫蠚溶金酥南窗燈火夜可喜篋中卷冊聊鋪舒
讀倦抱膝一吐氣契濶各在天一隅相別於今二百日
飛鴈南來無北書游從驩喜似舊否洛下為學安穩無

雖然貧窘少倚賴空腸慎勿多悲吁聖賢獨立以待用
提出日月還唐虞天地當中貫一柱孟子所謂大丈夫
躁兒跳躍不足數插翅強欲飛蟾蜍縱子不遇乃至死
勉之學為荀揚徒

荆江大雪

長鯨戲浪噴滄海北風吹乾成雪花漫空頃下不暫住
三日不見金老鴉天工鬪巧變物境玉作荊州十萬家
須臾堆地厚一尺直疑天漏亡由遮白頭老栢最崛強

壓折鐵榦紛髣髴竹屋夜倒不知數但聞走下雷霆車
南方瘴土本炎熱經膈猶生碧草芽忽遭大雪固可怪
凍兒赤立徒悲嗟青錢滿把不酬價斗粟重於黃金沙
此時刺史頗自愧起望霽景殊無涯有民不能為撫養
安用黃堂坐兩衙

和仲巽荊州大雪

黑雲撲下一天雪開簾正見花飄飄淥醑罇覆按不能飲
緬懷白髮同心交拈毫竄紙聊自戲不覺大語驚連黿

呼兒謐本寄之去豈敢有意夸雄豪
謗稱拋磚引鳴玉
遂蒙老手來相嘲且言本出將家子
慣看飛雲運沙起
常騎快馬臂蒼鷹
走屠赤豹裂青兒
燕山崢嶸鬱天起
玉關石壁俱天壘
昔纓漢冠為漢民
今埋胡沙作胡鬼
欲攜熊虎十萬師
獨以一帶掃羣螳
左鈐休屠批谷蠡
直出龍沙五千里
嗚呼君言豈不偉
單于聞之須怖死
莫羞茜袖雙鬢華
盤屈肺肝生嘆嗟
君不見東海老翁
含兩齒投竿起
載文王車又不見
荊州長史年七十手

提九鼎還唐家窮通變化不可測蟠蛟寧久藏泥沙况
君著意經營久奇策崢嶸爛星斗殿前即日拜將軍縛
取單于不引手我實讀書枉用心伊臯功名竟何有待
君金甲破虜歸且作長歌傾賀酒

杭州喜雪

吳兒經年不識雪忽驚大片遮空來黑帝不分苦荒拙
六花一夜隨風開平明掃徑招佳客座上豈無鄒與枚
荊州新釀發醅熟清光透徹黃金杯

冬日示楊季若梁天機

天河忽側飛電傾丁丁屋瓦相敲鳴撲衣寫下白玉粒
脚底踏碎真珠聲官舍高屋苦濩落此時不易孤客情
穎侯恰寄玉泉釀乳花甘滑琉璃清紅糟淮白復脆美
佐之綠菰作吳羹縱談往舊雜嘲戲大笑觴倒金酒觥
間以罰令却寂默四座睥睨如伏兵人生會合即為樂
況子歸意凌青冥赤尾鯉魚在泥滓行見兩翅穿鱗生
跳身聳鬣望東海蒼崖枯涸埋層冰明年春風掃地起

一起萬物皆光明

出城寄梁天機

春風徘徊來何時花光還破小桃枝不因出城見花樹
春到人間殊不知昔年逢花便買酒看花走馬猶嫌遲
花傍不醉不肯去醉到春歸花已飛誰憐官綬少風味
入春未拈金酒卮豈惟花少醉亦少當時故人今更稀

淮揚大水

淮揚水暴不可言繞城四面長波皺如一大瓢寄滄海

十萬生聚瓢中存水之初作自何爾舊堤有病亡其唇
劃然大浪劈地出正如百萬狂牛奔頃之漂泊成大澤
壯士挾山不可堙居民竄避爭入郭郭內衆人還塞門
老翁走哭覓幼子哀赴卒為蛟龍吞豈獨異物乃為害
惡人行劫不待昏此時蝦蟇亦得志撩鬚睥睨河伯尊
附城廬舍盡水府惟見屋脊波間橫間或大雨又暴作
直疑鉞盜相奔傾溝渠漲滿無處泄往往床下飛泉鳴
只恐此城瀕洞徹城中坐見魚鰓生豪子室中具大筏

此筏豈便長全身朝夕築塞漸排去兩月未見車間塵
且喜餘生尚存世資儲誰復傷漂淪京師乃處天下腹
亦聞大水來扣關至於河朔南兩蜀長江大河俱騰掀
豈惟淮揚一彈地洪濤乃撼半乾坤臣聞九疇天公書
三十六字先五行茲謂水德不潤下蓋與土氣交相爭
願召近臣講大義使之搜鑿災害根下書遣使巡郡國
曠然一發天子恩家貧溺死無以葬賜以棺槨收冤魂
蠲除租賦勿收責寬其衣食哺子孫開發倉庫收寒餓

庶幾瘡痍無瘢痕不爾便恐委溝壑彊者趣聚螽蟴羣
伏藏山林弄凶器今可先事塞其源朝廷固當有處置
賤臣何者敢僭論元元仰首望德澤惟願陛下無因循
行次漢水寄荆南漕唐司勳

漢水渺渺東南流蕭蕭雨打杏花洲欲託雙鯉寄書劄
不知幾日到荊州荊州故人日漸遠到時綠草滿沙頭
爭得報章來闕下鳳林北去不通流

憶陪諸公會張侯之第

姚黃魏紫雖絕品不言不笑空天斜不如共訪張公子
自有三枝解語花主人耳熱更促席坐客眼亂忘歸家
扁舟一夕若風雨悵望落日沉寒沙

山陽太守見招值病以長句謝之

山陽大都天下誇長淮蟠山無垠涯春風萬里漢東來
流輝泱泱不可遮繞城樓臺滿空紫瓦光碧滑流成波
東園花草趁姿媚真珠蓓蕾黃金芽太守政閒日無事
隼旗聊駐朱輪車寶明簪裾盡賢彥金盃酒成飛花

山河喧咽歌管外舞裾繡畫金縷霞都人來從無居人
飛塵雜沓何繁華固知太守為民意與民驩然無怨嗟
明日邀我復同遊我已病酒醉在家伏枕不得從車塵
坐見落日啼棲鴉

還汪正夫山陽小集

汪子文章何偉奇如觀天子乘輿儀怛然暴見殊驚疑
舌拄上齟兩目癡定神屏氣試引窺漸識羽衛行相隨
金吾飲飛開中遠橫刀執稍鐵馬馳畫旆赤白盤龍螭

大角一百二十支鑊鼓嘲車轆雜橫吹繡幡絳幢何紛披
罕畢鉞戟開黃麾屬車轆轤霹靂移侍郎御史冠戕危
圓扇孔雀雙翅垂辟邪白澤飛麒麟金輅赤馬火鬣鬚
飄飄鳳蓋翳華芝水光鐵甲羽林兒二十四仗驅熊貔
長父濶劒梢魁夔團花絳袖武士衣大小不同雖異宜
要之盡是聖賢為奇服怪玩一不施斥之所以尊皇威
汪子之文正類斯一十五軸紛葳蕤爛光直欲紙上飛
長篇短篇傾珠璣題說論序及賦詩篇雖不同皆有歸

要之孔子韓退之留讀旬日不知疲大渴適得甘露飴
我欲誦記留肝脾惟吾老鈍無記持又無小吏操筆揮
或可寫留慰朝饑二者不遂其齋咨今復奪去心黯黯
室中斗覺無光輝靈寶不可留洿池風雨送還滄海湄
嗟我居陳踰歲時兩耳無聞如塞泥遂恐聾聵不可醫
子來乃得時政治擬金伐石鳴鼓輦氣豪却似相凌欺
因子文章張我師使我發此狂簡辭

梁卦孫過飲

手搓兩眼睡已足落花滿床紅飄飄山鳥不須報春曙
清明自放端門朝夜來賓客偶過我呼奴留客解金鑰
花枝顛倒插翠帽酒杯傾潑淋春袍更深客去我亦醉
畫簾殘燭香初銷俛仰之間乃陳迹酒醒夢斷還無聊
白雲已抱日光落春水自共東風搖聖賢勞心當萬事
吾徒掃榻頻相招好花欲盡速來飲為君倒甕傾春醪

和人柳溪

三月二十七春叢已半空細草著露作團綠落花擁溪

相壓紅南北遊人歸未歸日斜飛絮撩東風

汪正夫云已厭游湖上顧予猶未數往遂成長

篇寄之

君已厭折湖上花我猶驅迫坐兩衙須知樂事屬閒客
日日攜觴不在家況君才力自少對取次落筆成天葩
春風湖上與之敵豪放麗絕無以加幽巖絕壁無不到
欲緣雲漢尋天槎頃屬勝游不得往猶如野馬絆在車
眼看紅英零落盡長條已被綠葉遮春芳雖晚猶得在

山丹正好紅相誇終當擺去百事役與君共躡南山霞
雖老猶能沃金葉卞娘送以雙琵琶已教樓下排花舫
醉倒碧山春日斜

寄題明州太守錢君倚衆樂亭

使君何所樂樂在南湖濱有亭若孤鯨覆以青玉鱗四
面擁荷花花氣搖紅雲使君來遊攜芳樽兩邊佳客坐
翠裯鄞江鮮魚甲如銀玉盤千里紫絲蓴金壺行酒雙
美人小履輕裙不動塵壯年行樂須及辰高談大笑留

青春遊人來看使君遊芙蓉為楫木蘭舟橫簫短笛悲
晚景畫簾綉幕鬪中流貪歡尋勝意不盡相招却渡白
蘋洲日落使君扶醉歸遊人散後水煙霏紫鱗跳復戲
白鳥落還飛豈獨樂斯民魚鳥亦忘機使君今作螭頭臣
遊人依舊歲時新空餘華榜照湖水更作佳篇誇北人
為題小靈隱修廣師法喜堂

浮屠藏家多在山飛舟跨海煩往還不如廣師開此堂
清曠不減山中間前有怪石天所鑱莓苔模糊蒼鬼顏

我時跨馬來扣關訪師對石終日閒

代人上明龍圖

兇徒盜覆甘陵城白日堂堂梟呼鳴生靈十萬陷死地
長刀大戟交縱橫留都丞相統河北雷霆四馳諸侯兵
鐵林舍圍三十里甲光如水魚鱗明風霜曠野苦暴露
未得鼠子腥吾烹天子憫惻覽羣議冠蓋滿朝賢公卿
安得破賊如裴度開封大尹宜其行公拜稽首出就駕
畫旆獵獵蟠虬螭沛然德澤隨車來一煦萬物皆發生

士卒奮怒爭以死遂窮巢穴誅根萌平賊之功無與讓
當見大軸歸老成夔臯拱列帝舜坐願補日月歌太平

題關彥長孤山四照閣

湖山天下之絕境羣山繞湖千百重碧笋四插明鏡外
此閣正落明鏡中綠波一穗掃沙尾擁門盡是紅芙蓉
清香斷處接蒼靄綠蘿攀樹登高峯當軒不置窓與檻
湖光山翠還相通側耳似聞天上語接手便欲翻長空
忽疑躍入畫屏上但覺毛髮生清風光景動蕩失天地

直與顥氣爭雄雄君何容易得此處著意鑿鑿由天公
西湖雖然多佳境游人到此景遂窮昔日郎官退居此
足踏藤履手攜筇時陪金壺宴親舊船飛兩檝如歸鴻
溪魚鮮白玉膏脆林果紅熟燕脂濃揮弄清泉倚蒼石
當時即是神仙翁又況諸子盡奮發綠袍照爛時相從
我來登覽但歎息有家不得居江東至今此景常入夢
尚有清氣留心胃屢蒙書尾追拙唱強臨紙札誠難工
湖山有靈必見笑便與棄擲無留蹤直須收拾買鄰舍

兄乎異日能相容

欽定四庫全書

鄖溪集卷二十六

宋 鄭獬 撰

七言古詩

上李太傅

陳人嘗傳李太傅云作太守來此州頃遭暴水拉隄出
設施畫略排橫流大偷嘗欲穴隄腹掩之即日斷其頭

至於小猾幸民禍鉤羅姓名皆不留

太傅諱士衡天聖中守陳是歲蔡水

溢而居民表氏者夜以繩齧堤太傅即掩誅之盡遷今所謂袁家口是也又水盛恐其善泅者乘之為盜乃浮

瓜於河募民投取之得一瓜輒賜以
卮酒由是盡得善泅者而藉廩之
陳人恬恬但眠食

恃公牢固如山丘今茲水暴瀦外郭眼見盜賊何由仇
况我方在艱阨中竄奔日懼蛟龍求烏乎不見李太傅
使我涕淚成沈憂

次韻程丞相重九日示席客

湖光飛出洞庭秋拍手齊看山公遊墨雲抱日離東海
蒼霞穿漏紅光浮我公重惜此佳節攜賓留燕停鳴騶
城角直穿一氣外碧鱗縹緲飛高樓晚花纖麗金靨開

平莎蒙密綠髮稠手把玻璃笑當坐飄然逸氣凌雲道
須臾大卷出新作鐵網色住鯨與虬四座傳觀賞佳句
絲管不發清歌留茱萸著酒紫香透芙蓉插髻雙眉修
後堂新壓菊花釀傾在玉盆凝不流美人再拜勸公飲
一飲可忘今古愁誰謂長戈可駐景誰謂萱草能忘憂
斯言寥闊不可考樂事須向尊前求霓裳法曲古來絕
小槽琵琶天下尤只此醉鄉有佳境此境不與人間侔

公之佳妓善霓裳
法曲而胡琴尤絕

酬余補之見寄

吾友補之會稽家高眉大眼稱才華入京共收大學第
姓名頭角相撐磨高樓管絃相與雜黃金酒面溶成波
罇前軒昂如孤鷹四顧不見雀與蛙試招紙筆恣揮掃
縱橫噴薄不可遮我疑君心如春風呵吐草樹皆成花
忽然驚爆險絕句旱天霹靂雷霆車我輩觀之瞪兩眼
汗流滿面空長嗟明年南北別君去落照滿帆秋風斜
天涯朋歡少披豁還如穴鱷跳泥沙兩耳喧聒久厭苦

思君便欲飛僊槎前時得君山陽書副之長句封天葩
筆墨勁健愈精絕鐵繩鈕縛虬爪牙有時風雨恐飛去
嘗自密鎖金鴉叉嗟我文字苦慳短才力不敵兩角蝸
下筆欲答輒自止如君一句已可誇持此聊且謝勤叩
念君不見愁無涯

酬隨子直十五兄

通州窮並大海涯廡壤不毛坤德虧床下矍索穴蟛蜞
我初來居常吟悲見君顏采方伸眉眸子清徹鬢垂頤

中懷洞然無由岐鐫鏡文字干有司古書細抄指生脈
弟妹鳬鴈行纍纍脫衣易粟飴其饑慈祥孝友鄉里推
前者天子親饗祠黃紙赦書疾風馳掛羅山林網逸遺
守臣奉詔敢言遲外臺使者爭薦之野廬供餽禮所宜
白袍大袖何紛披來居太學森蘭芝世俗譏議喜瑕疵
蒼蠅往來工讒詞椎鑿璞玉生瘡痍猛虎不如墻下狸
聽者雖明豈無疑紫薇羣公文章師發以鉅策健筆隨
鋪紙吐論語亦奇綴名紙末何其卑藻火為裳誠倒施

赤驥不得黃金羈編之下捩耳羸垂令我包羞心鬱伊
一舸東入長淮湄勿言顯發遂無期青衫猶足慰妻兒
海陵得君七字詩重謝解謗稱相知我雖有言如鈍錐
說之不入何能為願子加餐善自持高山峩峩寸土基
前途如壁不可窺榮落窮通各有時

戲酬正夫

汪子怪我不作詩意欲窘我荒唐辭自顧拙兵苦頓弱
安敢犯子之鼓輦子之文章既勁敏屢從大敵相摩治

左立風后右立牧黃帝秉鉞來指麾蚩尤跳梁從風雨
電師雷鬼相奔馳頃之截首挂大旆兩肩塚墓高嵯危
如何韜伏不自發欲用古術先致師遺之巾幗武侯策
司馬豈是尋常兒應須敵氣已衰竭然後鐵騎來相追
回戈坐致窮龐伏得非欲學韓退之嗟我豈敢與子校
唯圖自守堅城隄况茲憂窘久廢絕空餘衰老扶瘡痍
開卷舊守或不識豈能有意爭雄雌朝來據鞍試矍鑠
是翁獨足相撐支檢勒稍稍就部伍亦欲一望將軍旗

曹公東壁不差走周郎未得相凌欺便須持此邀一戰
非我無以發子奇

送蔡同年守四明

尚書蔡公在廊廟器業文章第一人繡整賜坐議大政
天子稱之社稷臣渥洼遺種出驥子纔生七日起其羣
蔚如長松倚絕壁灑落不雜人間塵東風共醉杏花下
滄波浩蕩天地春近者諸公薦御史宰相未識真麒麟
却借朱袍下南國畫船醉眠官不嗔吾徒對酒共歎息

破車快犢誠難馴陳蕃高才雖少對辟書聊慰汝南民
溪山見君亦須喜飛雲遮路迎車輪朱雲風采久寂寞
豈宜遠處滄海濱

送仲吳歸闕下

老驥不妄行蒼鷹不虛擊高車折軸棄路旁罌粟犢兒
負其力指麾萬事自有理不須破海驚霹靂君不見張
侯白頭郎仗節雍容在南國事如倒山落面來談笑當
之不遺策往時夸者欲驚俗揭浪翻風一千尺屢成大

獄沸如糜六月飛霜觸白日張侯不矜亦不倚老驥蒼
鷹稱其德洞庭之北十二州吏民帖帖甘眠食有詔奪
歸不得留正值風雨花狼籍離思浩蕩入青春楚澤荆
山淡無色此行況是赤縣官君新除府
署提舉賢者宜令天子
識公雖已老心尚存今不急用真可惜但用河南張漢
陽何必東山謝安石

送人東上

騏驎太俊不得馭塵埃尚走高陽翁奇文泣下鬼神血

高議鑿開天地聲
平明仗劍背我去
老蛟奮鬣歸江東

送李處士南歸

駕車跨馬聲嘈嘈
長劍濶佩橫滿朝
塵埃走趨顏髮老
先生久客得無勞
夜來氣味有秋色
歸心鬪與秋風高
揭竿跨浪好歸去
扁舟爛醉眠雲濤
大小不能薦天子
遣詩有意徒嘒嘒

題名碑石琢之已成求
章伯益友直先生篆額
老匠隳山斬蒼石
偃然巨璞長於席
銳鑿飛椎日鏡擊

金鎔嘲轟滿虛室白沙礪就大禹圭紺滑自同青玉色
兩螭攫拏相關立欲求大篆冠其額先生絕妙不須言
引墨為我一落筆蟠屈玉筋入石壁吾曹名氏遂輝赫
異物不復容侵蝕赤尾鯉魚問消息丐我數字得不得

讀朝報

天子曉坐朝明光丞相叩頭三拜章乞還相印避賢路
願為天子專城隍上恩深厚未聞可丞相退讓聞四方
濃書大紙批聖語鳴騶却入中書堂

滯客

五月不雨至六月河流一尺清泥渾舟人擊鼓挽舟去
牛頭刺地挽不行我舟繫岸已七日疑與綠樹同生根
忽驚黑雲湧西北風號萬竅秋濤奔截斷兩脚不到地
半夜霹靂空殺人須臾雲破見星斗老農嘆息如銜冤
高田已槁下田瘦我為滯客何足言

感懷

北風哭夜星辰寒竹籬敲憂鳴琅玕老蟾瘦噤失光采

天地凍合魚龍乾
慨然憶歸幾千里
長江大山交屈蟠
湘水東去注不極
我心夜夜如鳴湍
弟兄起居諒懼適
高堂綵衣翩翻翻
嗟我摧頽落滄海
兩腋恨無雙飛翰
遠方就學何所得
數年短髮才勝冠
何時拂袖得歸去
春風笑湍南陔蘭

木渠

木渠遠自西山來
下溉萬頃民間田
誰謂一石泥數斗
直是萬頃黃金錢
去年出穀借牛耕
今年買牛車連連

須知人力奪造化膏雨不如山下泉雷公不用苦震怒
且放乖龍閒處眠安得木渠通萬里坐令四海成豐年

道傍稚子

稚兒怕寒床下啼兩髀赤立仍苦饑天之生汝豈為累
使汝不如鳬鶩肌官家桑柘連四海豈無寸縷為汝衣
羨爾百鳥有毛羽冰雪滿山猶解飛

買桑

出持舊粟買桑葉滿斗纔換幾十錢桑貴粟賤不相直

老蠶仰首將三眠前日風雨乖氣候凍死箔卷埋中田
蠶不見絲粟空黼安得衣食窮歲年

題正夫小齋栽新竹

竹皆雙植

斲開俗境栽新竹滿地冰圓映玉膚高梢爭出翠鳳尾
孤根對植蒼龍鬚雨聲曾洗越溪石風影寫成湘水圖
獨有素娥留夜月與君相對倒金壺

捕蝗

翁嫗婦子相催行官遣捕蝗赤日裏蝗滿田中不見田

穗頭榔榔如排指鑿坑篝火齊聲驅腹飽翅短飛不起
囊提籬負輸入官換官倉粟能得幾雖然捕得一斗蝗
又生百斗新蝗子只應食盡田中禾餓殺農夫方始死

獐猿

翠樹不從青嶂出蟠根却向屏中生黃獐引脰探綠葉
老猿護雛枝上驚獠然相顧見異態誰言野物能忘情
我來賞激繞屏下亦疑此身林中行自古畫工無畫者
今得絕筆方傳名吾廬昔在鄖溪上湍溪桃花春水明

曾隨麋鹿藉芳草更倚白雲聽嘯聲

省中畫屏蘆雁

高堂傾動長江流黃蘆羣雁滿滄洲
掃開長安塵土窟寫出江南煙水秋
兩雁斜飛入空濶四雁顧慕橫沙頭
高風拉折蒼玉榦蘆花雪盡無人收
赤日飛光不敢近但覺爽氣屏間浮
嘗聞畫龍入神變坐馳雲雨天地遊
只恐此雁亦飛去瀟瀟萬里誰能留

黃雀

啾啾黃雀竹間飛
日晚復歸枝
上棲雪粒蓋地三寸玉
地膚凍裂不作泥
錦韞公子臂蒼鶻
快馬踏下黃雲低
馬前紫兔躍白草
老拳下批饑兒啼
啄鮮裂血飽腹去
可憐黃雀空死饑

五言排律

和御製賞花釣魚

曉日開閭闔
春風滿未央
水搖天仗影
花雜御衣香
覆檻紅梢接
連鈎紫鬣長
千鍾浮帝酒
五色染天章
鄒馬

摘嘉頌夔龍拜壽觴金輿歸晚處正在五雲傍

程丞相生日

大昴光芒正荆河氣象渾始知真相出遂見本朝尊漢
地汝陽國程侯司馬孫精剛得金氣深厚體乾元申甫
生周嶽臯夔拱舜軒山河歸妙算社稷繫昌言九鼎羣
生重洪鑪一氣奔羣雛忌鵬鶚衆草失蘭蓀慷慨提千
騎扶搖下九閭秦闕春草短注水暮雲屯詩必曹劉敵
兵須衛霍論談餘珠委積筆落鳳騰騫秀髮煙霞外丹

心金石存未歸真宰柄猶倚大師藩日月回龍角星辰
會紫垣氣凌金節潤風入繡旗翻歌筦傾南國簪裾拜
慶門飛黃下天廐縹酒賜堯樽固有神靈護應知福祿
蕃蟠桃三結實未見老雲根

後閣四松

丞相當時植幽襟對此開人知舟楫器天假棟梁材錯
落龍鱗出灑褫鶴翅回重陰羅武庫細響靜山臺得地
公堂裏移根澗水隈吳城夢寐遠秦嶽歲年催轉覺飛

纓謬何因繼組來幾尋珠履蹟願比角弓培栢悅猶依
社星高久照台後凋應共操無復問良媒

夜意

卧北斗柄直插西月角橫風吹病骨醒秋入壯心驚
騏驎老方健太阿靈有聲山河寄功業樽酒識平生豺虎
須探穴朝廷可息兵山西少勁氣天外縱長庚自古輸
成算誰人解請纓干戈五十萬何日到燕城

出城

塵土滿城黑出城雙眼寬山川秋氣惡風雨晚潮寒物
象颯以變泥污不可蟠英豪重節概兒女感衰殘霜老
凋弓勁風焦盡鼓乾蛟螭正無賴好擲六鰲竿

五言律詩

晚晴

人間久厭雨最快是初晴驟見碧林影喜聞歸鴈聲乾
坤一蘇醒耳目兩聰明寄語浮雲意休來污太清

乍涼

雲湧海潮黑軒窗涼氣侵清風醒病骨快雨破煩心噴
薄紫荷蓋飄飄青桂林作詩招醉友方外一相尋

淮西道中

夾道柳梢長竹橋風影涼行人殘照裏歸路白雲傍泉
淺帶土味崑深聞草香到家花已盡杏頰擁枝黃

舟泊

鳴櫓解雙纜寒蒸江氣昏春雲兼雨重晚水帶潮渾小
市魚蝦集空亭燕雀喧一尊得濃睡行計不須論

江行

碧草已堪剪長江二月頭林深藏宿雨岸豁聚春流潮
背燕支浦山橫桑落州松醪欺客病易醉苦難投

雨後江上

船泊碧鑑裏清風晚思長江臯過微雨秋色滿斜陽浮
野山光動侵衣水氣涼好尋紫溪叟共醉碧荷香

雲中憶歸

何日燕南去平生此別稀定知花已發不及雁先歸寒

日連雲慘驚沙帶雪飛雲中風土惡換盡別家衣

臨淮大水

大水沒樹杪涉冬原隰平蛟龍移窟宅蒲稗出縱橫壞屋久不補汙田晚更耕接春恐流散何策活蒼生

邇英閣早直

綠樹蔭脩廊雲深別殿涼星文開帝座玉色泛天光大典尊周孔名家盛漢唐

時講春秋讀漢唐二詩

自憐携釣手持筆

翠旒傍

朝退

朝退洗雙耳厭聞人是非不知春意晚時有燕聲歸散
木還容老孤雲亦倦飛趨時自踈闊不是學忘機

閒居二首

空庭羅雀網應似翟侯居多病惟尋藥忘機不著書僧
來留石鼎人在典金魚惟有南窗睡春來分不踈

不從山下住若箇似山家留地教移竹開門自掃花林
踈容鶴卧溪淨怕雲遮落日杖藜去塋頭看稻牙

閑悶

閑悶萬千縷金刀不可裁
逢人心不記見酒眼方開
亂夢無時斷殘春數日回
東風固相惱時送落花來

晚悶

晚悶牢難破秋懷勇未降
何人歸楚國竟日憶滄江
鼠跡排書簾蟲絲網酒缸
江都章未報枕手卧南牕

小軒

鑒見碧天影秋光注小軒
消閑惟蠹簡破悶有金尊
怪

石中邊透老松鬚鬣繁人生有佳尚塵土暗朱門

不出

高卧即經旬林間掛葛巾野雲閑照水山鳥自啼春
釀酒期佳客開書見古人莓苔漬雙履不識洛陽塵

憶在晉陽

憶在晉陽日曾為痛飲家披衣投宿酒把燭覓殘花
莫解玉驄馬且留金鈿車壯遊今不復愁卧鬚將華

送周密學知真定府

白髮漢中郎旌旗下建章雪通沙路潤春入塞雲黃地
勢井陘口天文大昴旁平時卷金甲壯畧寄壺觴

送惠思歸杭州

湖上秋風滿歸懷豈易寬身隨秦樹老夢入浙江寒為
客久應厭到家貧亦安石房舊書在重拂綠塵看

送盛寺丞

蕭相關中守元瑜鄴下豪秋風嘶白馬路草照青袍地
入參旗近河連積石高當年兵戰處尊酒屬吾曹

送張景山知康州

遂溪張太守懇意乞南州家在白雲下郡當滄海頭旌
旗瀧水晚風雨瘴山秋解却淮西印輕為萬里遊

擇甫初授

蔡州確山知縣也

贈任某

寂寞任夫子窮山秋氣寒塵埃雙鬢白金石寸心丹不
悔窮經老所嗟行道難太阿終亦斷寧久匣中蟠

寄汪正夫

汪子清徹骨竦如秋竹竿高名九鼎重俊氣一峯寒議
論今誰對文章古所難青蠅變白黑無汙碧琅玕

寄陸憲元

陸子處乎順雖窮志愈剛劍埋金不蝕圭折玉猶方古
意閑中見浮名靜外忘行藏吾自得可笑接輿狂

李道士

金鼓破南粵山中冷不聞是非同一馬富貴自浮雲吐
納龍虎氣遨遊麋鹿羣朝來問丹訣已酌凍醪醺

次韻酬張擇甫

別後正春孟溪頭黃柳牙相思滿芳草獨自照殘花晚
樹秦川闊黃雲瘴海賒上樓無別望歸路向西斜

留別汪正夫

夫子青雲士聲名孰與齊心經時事老顏向俗人低氣
象必衝斗風雷猶蟄泥行看萬里志聊爾謝羣鷄

正夫
方舉

賢
良

贈儀真密禪師

渾淪老學佛到處說支郎

施君自號渾淪男子盛談密禪師為淮南禪宗斷臂

求諸法浮杯徧十方
自栽雙栢樹獨坐一繩床
惟有林間客時來扣竹房

即事簡友人

門巷徧芳草相期春醉稀
可憐雙燕到還似故人歸
幽鳥隔溪語落花穿竹飛
誰知靜者樂石上脫朝衣

久不得孫中叔信

秋風起天末之子在窮途
久客住應悶故鄉歸得無
清

淮不到渭晚樹自沈吳願寄一樽酒與君消壯圖

明皇

四海不搖草九重藏禍根十年傲堯舜一笑破乾坤
貌皆冠冕豺狼盡子孫潼關兵已破會憶老臣言

晉陽宮基

金屋無寸瓦蒼然老樹青海枯露龍穴火盡見坤靈
自惜流血處於今土氣腥廢興千載事過耳一飛霆

題招提院靜照堂

招提去山遠還似在山家晚日惟歸鳥春風自落花空
談銷劍火醉墨灑天葩更欲拏舟去清溪月正華

題處士居

高卧太湖石自嫌名利腥網羅當道路鴻鵠出青冥氣
貯秋琴淡心蟠古劍靈我来閑劇論山鬼不須聽

王氏園

車馬少行跡鄰僧為掩門飛泉鳴似雨老竹瘦於孫幽
鳥靜相語晚花寒亦繁主人雙綬重遊客倒金樽

簡夫別墅

靜境清無敵門前繫鹿車買山憑野客覓竹到鄰家
恭為尋圖勝書因借本差平時非厭仕所樂在桑麻

簡夫北墅

先生已到舍稚子未歸樵草晚牛羊病場登雀鼠驕孔
顏雖困魯夔契未忘堯自笑非逋客煩君重見招

挽程中書令三首

社稷方為繫乾坤豈不容廟堂遺劍履風雨失蛟龍漢

將蓮花幕周人馬鬣封小羌猶慢禮先折太阿鋒
舊愛霓裳曲翻聞薤露謠賢人今已矣天道竟如何泉
下一杯盡人間萬事多空餘幕中客寫淚劇懸河
湖上千條柳山翁舊日栽自從春水綠不見相車來明
月何須好餘花忽更開平生歌舞地零落濕蒼苔

挽仁宗皇帝辭五首

恭儉同堯舜憂勤固損年悲風來萬國白日下中天薄
葬遵周室初陵兆洛川至仁推廟號百世不能遷

四海一明鑑舟車萬里通名王花賜綬戰士錦韜弓
武曾疲戰明皇亦召戎爭如四十載終始太平中

付託神靈器子孫千萬年果為天下福遂得聖人傳
已定無疆業方成顧命篇明朝無一事脫屣或登仙

歌舞西陵望衣冠渭北遊應從天上樂不為世間留
龍去鼎湖晚鴈飛汾水秋羣臣淚橫臆空拜翠雲裘

曾從西池幸宮花落未稀日隨黃繖轉雲繞赭袍飛
臨水樓臺在傷心歌管非都門舊行處却望壽山歸

挽吳宣徽育

平生負高節至死寸心丹
明主雖容進孤臣豈易安
神歸嵩嶽黑人哭洛川寒
不識平津面臨風亦涕洟
大策三千字朝廷耳目醒
高名動牛斗直氣破雷霆
美行皆成法閑談盡可銘
悲哉真玉樹風雨一飄零

傷田肅秀才

慟哭遂滅性誰言天道長
未收雙寶劍已失一飛黃
稚子遙虛祭孤棺寄異鄉
可憐江夏守不得薦黃香

石榴

高枝重欲折霜老裂丹膚
試剖紫金碗滿堆紅玉珠
根雖傳大夏種必近僊都
題作江南信人應賤橘奴

貢麟

麟本出中國無聞貢海濱
豈將遠方獸煩我太平民
烹割羅牲餽奔趨掃路塵
漢高嘗聘士此禮屬蠻人

欽定四庫全書

集部

鄖溪集卷二十七

詳校官庶吉士臣馬履泰

檢討臣何思鈞覆勘

謄錄舉人臣秦 桐

謄錄監生臣黃 維

欽定四庫全書

鄮溪集卷二十七

宋 鄭獬 撰

七言律詩

昔遊

小旗短棹西池上
青杏煮酒寒食頭
綠楊陰裏穿小巷
開花深處藏高樓
紫絲絡馬客欲起
錦袖挽衣人相留
逢春倚醉不自醒
明朝始對春風羞

夜懷

獨倚青桐聽鼓聲參旗歷落上三更涼風卷雨忽中斷
明月背雲還倒行賴有清吟消意馬豈無美酒破愁城
是非人世何須校方外曾師阮步兵

獨遊

馬後獨攜一壺酒林間更解紫綸巾飛來白鷺即佳客
相對好花為美人萬事易忘唯劇醉四時難判是殘春
吳兒曾識陶彭澤又見羲皇一散民

野步

留着雲扉儘晚關
穿林踏破紫苔斑
虹蜺渴雨欲下澗
魍魎避人還入山
石觜露烟孤壁刺
溪腰纏草綠灣環
野僧有意待明月
獨倚一筇松竹間

清明郊外

桃葉青青杏子肥
清明雨後舊花稀
草翻蝴蝶日將晚
門掩鞦韆人未歸
春艷濃堪燒美酒
湖光綠好染羅衣
柳條滿插金車上
一路香塵去似飛

驟寒

四擁蒼雲拂浪驚北風飛下海濤聲水搖冰骨凍未得
雨作雪花開不成玉匣寶刀鋒欲折鐵衣戰騎力還生
杏梢柳葉無聊賴為祝鳴鳩探晚晴

晚發關山

燭前行客捲征衣路轉平林入翠微家在白雲鄉裏住
人從明月嶺邊歸來時未見梨花破別後方驚燕子飛
綠樹連陰十三驛從今歸夢到家稀

宿白雪驛

春酒味濃殊不解繞廊倚柱獨徘徊蒼山碧樹共沉寂
明月斷雲相往來細雨忽飄溪外去好風却傍竹間回
朝來已有西歸燕為問庭花幾日開

再至會稽

自憐多病趁朝稀合引朱轡東路歸名姓未通丹陛下
夢魂已過浙江飛人生如意即為樂世事驚心漸覺非
正是春風催酒熟螭蟬霜飽蛤蜊肥

金陵道中

六國相排一局碁岸頭百草野烟微樹深啼鳥自相失
山靜晚雲猶未歸濡口潮回殘照滿石城春盡亂花飛
周郎屈指圖天下誰道江南玉鱸肥

汴河夜行

汴流長恐日夜落夜行愁殺刺船郎櫓聲驚破老龍睡
船底觸翻明月光大兒燈下尋難字小女窓間學剪裳
自笑病夫無所事一尊身世兩相忘

下第後與孫仲叔飲

萬里青雲失意深
畫樓酒美共登臨
不羞獨落衆人後
却是重辜親老心
一缺不完非折劒
至剛無屈是精金
男兒三十年方壯
何必尊前泪滿襟

江上

蘆葉蕭蕭江上秋
鮒魚清酒解消憂
雲纔散後月當浦
潮欲來時風滿樓
好景未應輸白鷺
飛塵終不到扁舟
晚來天卷蒼霞盡
萬頃玻璃爛不收

次韻汪正夫對雨

雨氣飄蕭動竹齋
驚秋高思若為裁
壯心雖被愁催去
懽意須憑酒借來
雲脚一從邊地合
風頭半是海潮回
長汀從此傷搖落
獨有騷人最費才

雨餘

飛雨淙淙萬弩奔
雨餘氣象變朝曛
長虹掛雨出青嶂
落日翻光燒赤雲
得水跳蛙惟召鬧
投林棲雀自求羣
欲尋方外無窮樂
更滿梨花四五分

水館

繞舍清流淙碧玉塵懷開闊灑然醒
牕櫺風入秋氣活
橋脚倒撐天面清
露濕風標紅
芰老雨生鱗
甲伏龍腥
將書借取琴
高鯉從此橫
騎入杳冥

春盡二首

春盡行人未到家
春風應恠在天涯
夜來過嶺忽聞雨
今日滿溪俱是花
前樹未回疑路斷
後山纔轉便雲遮
夜間絕少塵埃污
惟有青泉漾白沙

禁籞平明帳殿開
華芝初下未央來
人間彩鳳儀韶曲

卷二十七
天上流霞滿御杯
花近赭袍偏燦爛
魚窺仙仗亦徘徊
蓬萊絕景何曾到
自愧塵蹤此一陪

松陵道中

蕭蕭落日荻花林
秋浪陂陀快醉襟
江上碧峯偏入眼
沙邊白鳥最知心
百分美酒酬雙鬢
一覺高眠敵萬金
聞道鱸魚屬張翰
飛帆欲過五湖尋

次韻丞相柳湖席上

湖上春深不見沙
畫橋飛影入晴霞
園林到處消得酒

風雨等閑飛盡花
令罰艷歌傳盞急
詩成醉墨落牋斜
蘭亭樂事無絲管
待與羲之子細誇

早朝馬上口占

赤城橫絕六鰲頭
夾道欄干覆御溝
殘月畫樓雙闕曉
涼風綠樹萬家秋
聯飛羣鵠媿豪彥
醉卧落花思舊遊
御史臨班望天陛
紫雲飛繞翠雲裘

早朝

花鬢斑虬駕早朝
玉欄宮殿壓雲濤
九州畫地中原壯

萬象橫天紫極高
日月輝明留闕角
龍蛇蟠結動旌旄
羣仙遙望蓬萊拜
五色非烟繞赭袍

恭和御製賞花釣魚

輦路鮮雲五色開
一聲清蹕下天來
水光翠繞九重殿
花氣醲薰萬壽杯
繡幕烟深紅匝匝
文竿風引綠徘徊
蓬山絕景無人到
詔許羣仙盡日陪

題垂虹橋寄同年叔櫟祕校

劉攽字叔櫟原父之弟時為吳江尉

垂虹橋又名利往橋

三百闌干鎖畫橋行人波上踏靈鰲
揅天蟠螭玉腰潤跨海鯨鯢金背高
路險截開元氣白影寒壓破大江豪
此中自與銀河接不必仙槎八月濤

攜李亭

閒抱琴書攜李遊仙壇古屋一筇留
驛橋通市人沽酒湖水依城客放舟
葵扇桃笙聊却暑蘋花楓葉已知秋
坡翁仙去詩聲在寂寞林塘卧白鷗

月波樓

古壕鑿出明月背樓角飛來兔影中野色更無山隔斷
天光直與水相通溪藏畫舫青紋接人住荷花碧玉叢
誰把金魚破清暑晚雲深處待歸風

題淮陰侯廟

漢高不得淮陰將天下雌雄未可知力勸君王回蜀道
便攜諸將破秦師故人斬首誠非策女子陰謀遂見欺
終使英雄鑒成敗未圖功業自先疑

初春欲為小飲先寄運使唐司勳運判張都官

人生長與賞心違，莫遣樽前笑語稀。
老去未羞花插帽，醉來不怕酒淋衣。
免聽畫鼓催朝去，且駐金鞍待月歸。
休道東風猶早在，落梅已撲翠苔飛。

九日登有美堂

點檢東山窈窕娘，直須醉倒為重陽。
山光湖水一時好，酒面菊花同色黃。
便好共謀長夜飲，未應排出少年場。
傷時感舊知何限，還憶荊州落窳鄉。

次韻張公達遊西池

醉漾蘭舟不忍歸斜陽已落碧雲西天開銀漢水初滿
春入武陵人自迷殿倚黿頭連繡幕橋飛虹影度金堤
遊人不惜殘花地無限落紅粘馬蹄

呂稚卿

公孺

唐彥範

詔

並賦遊西池亦成斐句

青翰龍舟雲外橫黃金殿閣鏡中明波光柳色恰相似
酒味人心俱有情醉灑珠璣留滿紙晚騎鸞鳳下層城
遊人應解笑狂客隔水映花聞語聲

同彥範謁仲異飲之甚樂仲異且有北歸之期

情見卒章輒用寫呈

明珠堆滿赤金盤未買花前笑倚欄
特地尋春難約伴等閑攜酒却成歡
人生試把從頭算世事何煩著眼看
莫怪夜深猶換燭它時相望在長安

再和

海棠亂插滿瑠盤為愛繁梢更繞欄
顧我有情還惜別問君未去且留歡
錦裯只就花邊卧紅袖偏宜燭下看
若背荊州容易去故人於義未為安

遊金明池

萬座笙歌醉復醒
繞池羅幕翠烟生
雲藏宮殿九重碧
春入乾坤五色明
波底畫橋天上動
岸邊遊客鑑中行
金輿時幸龍舟宴
花外風飄萬歲聲

盆池

綠髮柔莎碧甃連
湛如蛟穴貯寒泉
誰將寶鏡遺在地
照見浮雲浸破天
數鬣遊魚纔及寸
一層綠荇小於錢
待將開物都除却
放出秋蟾夜夜圓

李都尉瑋芙蓉堂

堂上芙蓉花最饒
開時不見玉欄橋
來從洛浦見羅韞
生在楚宮俱細腰
何處仙人來跨鳳
夜深明月好吹簫
剩收秋蕊為佳釀
醉入飛雲解畫橈

東園招孫中叔

花路橫梢已礙馬
斷無人迹賞年芳
綠楊成穗點著地
胡蝶作團飛過牆
不柰夢回多黯鬱
長因酒後得淒涼
期君待與春翁約
買取東風任醉鄉

次韻元肅兄汴口阻風

風阻浪頭如駢馬險於天塹欲催車却隨宿雁留寒渚
深羨飛雲繭碧虛對酒客懷真土梗滿船生計只圖書
世無勇弄攜之去不得連鰲作鱸魚

次韻元肅兄三題汴渠夜泛

汴渠夜泛亦快意月射長波如斷冰不見湘靈揮寶瑟
空教水怪避犀燈烟雲疊影相虧蔽星斗翻芒互降升
好蓄金錢多買酒滿船載去覓嚴陵

雨夜懷唐安

歸心日夜逆江流
官柳三千憶蜀州
小閣簾櫳頻夢蝶
平湖烟水已盟鷗
螢依濕草同為旅
雨滴空堦別是愁
堪笑邦人不解事
區區猶借陸君留

蜀人舊語謂唐安有三十官柳四十

琵琶濕螢依草
沒梅宛陵詩

過魏都

憶把貂裘買玉壺
重來不敢解金魚
當時曾謁將軍府
今日還乘使者車
歌管漸非人去後
樓臺依舊雪消初

韓門弟子偏悵悵
淚滿潮陽者舊書

勸客飲

誰解西回滄海波
且聽白苧數聲歌
人生所得只如此
世事到頭無奈何
酒海莫教空濩落
金堆安用鬱嵯峨
古今共是一丘土
只有劉生得計多

初入姑蘇會飲

涼風飄灑入高閣
滿城綠樹飛雲濤
渴來夢吞滄海潤
醉後眼掛青天高
湘江姹女碧瑤佩
金谷謫仙紅錦袍

吳兒柔軟不慣見應笑儂家詩酒豪

江正夫飲邀舉家留佳什僕酷愛其金斗玉泉
之句輒次高韻

相逢漸向白頭年世路諳來盡付天六印雖多終是客
一壺纔倒即為仙穿天入月捉詩句搥鼓插旂飛酒船
長願醉眠渾不醒虛名安用俗兒傳

次韻梁天機見寄

一聽秋聲鬢已凋孤心驚起拂星杓輪囷自分為蟠木

落寧堪作大瓢新篋唱酬詩草滿舊衣傾潑酒痕消
高篇已許臨佳菊更作欄杆護翠條

往年與劉元忠諸公尋春夜歸今茲卧病感而
成篇

已醒又醉倦遊客乍雨却晴寒食天共繫紫騮芳樹下
却隨紅燭落花前層城已報黃金鎖外苑猶貪碧草眠
明月春風依舊好竹溪散盡酒中仙

喜吳幾道遷右正言知諫院

精金喜入陶鎔手玉鑑直須明主知志士本來能許國
古人所恨不逢時漢成不用朱雲劍舜帝嘗聞大禹辭
莫道孤居無感激按掌兩耳聽京師

戲學張水部贈河南少尹

河南少尹鬢如絲角里先生是吏師花下放衙因試酒
竹間留客為尋碁年勞只許抄書數月俸長留買藥資
已說開春須上表終南山下乞分司

施君作詩贈謙師亦求拙句乃作五十六字綴

其後

聞道天台謙上人溪魚野鳥共忘形林間無事結跏坐
石上更安圓覺經定處只應山鬼護講時還有海龍聽
何年蠟屐緣雲逕一叩靈仙不死庭

送曹比部赴袁州

船頭獵獵兩旗翻六月江風灑面寒一日却稱新太守
十年曾是舊郎官中間憂患誠為甚向老風情亦未闌
紫背蛤蜊白醪酒開尊長解憶長安

次韻元肅兄見喜知荊州二首

踰年謬掌鳳凰詔
擇日拜章芸若庭
擁節笑歸江漢國
飛帆醉拂斗牛星
留連物景詩千首
凖擬交親酒百罍
共採芳蘭晨事畢
不妨兒姪夜橫經

西風原上鵲鴿鳴
喜見朱旗畫獸獰
塵袖漸拋秦地遠
雲帆聊作楚江行
人家掩映寒塘水
秋物鮮明綠樹橙
欲表新阡在鄖國
不同張翰浪逃名

余以襄事
乞守荊州

憶泛西湖

四面青山紫繡圍平湖萬頃碧羅衣風搖酒面金鱗活
月弄波光玉篆飛醉客半眠紅燭下盡船行唱採蓮歸
十年衣袖遮塵土惆悵飛雲滿翠微

次韻石秀才淮上偶作

出汴忽如魚脫網長淮萬里斷煩囂白雲已抱日光轉
碧浪更和天面搖自此乘槎須犯斗誰能鞭石解為橋
玉京醉客無消息不及蓬山兩信潮

酬盧載

三百年來無作者杜陵氣象久焦乾縱吟一夜鬼神哭
開卷滿天星斗寒渾脫無蹤疑造化塵泥有意汚波瀾
傷懷刻句無人會寄與江南庾信看

舟次蕪湖却寄維揚刁學士

柳葉初黃未解飛東風還與賞心違縱逢春處花期少
自過江來酒病稀平子解酬青玉案秋娘能唱縷金衣
揚州二十四橋月長憶醉乘明月歸

夏夜淮上寄隨子直

天面玻璃滑欲流，淮光浮動浩難收。
夜涼明月都如水，雨後清風却似秋。
幾日重來還把酒，一回相憶却登樓。
窮愁著得新書就好，寄雙魚碧海頭。

曹伯玉駕部

琰

相會於姑孰，既別得書及詩，因

以拙句奉寄。

東風綽約過前溪，碧草纖纖苦未齊。
春到好花隨處有，醉來佳客不相攜。
高眠未博黃金印，秀句如鐫白玉圭。
倒指驛程今甚處，盡船應過楚江西。

君將退居故有高眠之句

素風堂

潁水纖纖清露石仙翁於此買烟村唐朝三百盛冠蓋
丞相幾家餘子孫耀世文章雖已遠傳家清白至今存
由來人物能相繼又見芝蘭秀一畝

致政李祠部

畫省仙翁綠鬢斑林間高掛兩朱轡更無歸計買泉石
欲以清名遺子孫閑作好詩消白日都將生事付清尊
嗟予憂病為踈濶不得攜筇奉笑言

尊酒還成世外名二千石印一毫輕驥雖老去壯心伏

鶴自病來仙骨清

祠部以病引退今益清健

林下已能忘歲月人間

何必仕公卿淮陽塵土無佳賞每見山翁眼乍明

寄長沙燕守度

魏都南館相逢日鬪向春風倒一尊連夜花門駐歸騎
即時席上挿降幡雲藏夢澤烟蒲老秋卷湘江雪浪翻
聞道玉厨新釀熟莫將餘瀝酌潺湲

送潁川使君韓司門

喜君又佩魚符去，駟馬雍容朱兩轡。
自昔諸侯穎陰國，太平宰相魏公孫。
水邊日落旌旗暗，花外風高鼓角喧。
到部行春應未晚，綠村正是杏梢繁。

次韻程丞相牡丹

曾倒金壺為牡丹，矮床設座繞花壇。
有人偷插玉釵上，到夜更留銀燭看。
醉裏春風遺翠帽，歸時寒月送瑯鞍。
如今蘭棹催西去，惆悵明年誰倚欄。

寄關彥長

景仁

黃金斗印未垂腰繞舍湖山弄翠濤飢鳳羽毛寒不鍛
卧龍頭角老方高鐔前襟抱生平盡醉裏文章氣格豪
休論升沉向衰俗功名到底屬吾曹

次韻酬項城姚子張到縣感事

膠西童子近之官坐按春秋討隱桓

子張善春秋

休歎折腰

向彭澤猶勝索米困長安來篇喜見萬金字厚報恨無
雙玉盤莫就白雲買烟艇磻溪久已棄魚竿

送郭元之東下

稍稍十幅健帆風大醉長歌下浙東
甲乙未能求將相
詩書多是誤英雄
百年盡寄閑心外
萬事都拋冷笑中
白面書生少奇策
不知誰建太平功

送隋孝廉之官桐廬

萬乘君王曾降詔
弊裘瘦馬入咸秦
太平策畧三千字
天下英豪二十人

隋君用詔書時起試策
同時舉者二十餘人

自合乘時攀

日月如何隨衆走
風塵桐廬主簿官
雖小百里之間亦
有民

賀張公達暮春寄宋使君

獨繞欄杆正惜春，不堪西望隴頭雲。
弄烟細柳纔三尺，着地殘花厚一分。
梁苑草深平似熨，秦關山煖翠如薰。
騎鯨李白時過我，未引金尊先說君。

再和

使君攜酒送餘春，縹緲高懷倚白雲。
新曲旋教花下按，好題只就席間分。
阮公醉帽玉山倒，謝女舞衣沉水薰。
自笑塵埃滿朱紱，良辰樂事兩輸君。

寄題冲雅虛心亭

高僧酷愛翠雲枝
雨後新陰翠入衣
為恨烟溪生處遠
自尋雲逕斲將歸
有時風雨闌不解
只恐蛟龍活欲飛
好向繁梢結秋實
丹山正是鳳凰饑

張寺丞

次山

見訝久不致書
兼惠佳篇輒用奉

答

數日看花生怕遲
杭州更有亂花園
為貪攜酒尋春去
不及修書趁雁歸
且擊壯懷期篆鼎
莫緣華髮便沾衣

來詩有二
毛之歎

誰知寂寞寒山外
萬里蒼鷹正苦饑

叔高有壯志而

少者知者

奉詔赴瓊林苑燕餞太尉潞國文公出鎮西都

都門秋色滿旌旗
祖帳容陪醉御卮
功業迥高嘉祐末

公至和中首陳建儲之策
精神如破貝州時

白居易獻裴晉公詩云聞說風情筋力在只如

初破蔡州時

匣中寶劍騰霜鏑
海上仙桃壓露枝

公之子近有登瀛之

命
昨日更聞褒詔下
別看名姓入承襲

送程公闢給事出守會稽兼集賢殿脩撰

越州太守何瀟灑，應為能吟住。集仙雪急紫濛催，玉勒

公奉使方歸紫濛北方館名也

日長青瑣聽薰絃。一時冠蓋傾離席，半

醉珠璣落彩箋。自恨君恩渾未報，五湖終負釣魚舡。

寄程公闢

念昔都門手一攜，春禽幾向苧蘿啼。夢回金殿風光別，吟到銀河月影低。舞急錦腰迎十八，酒酣金盞照東西。何時得遂扁舟去，雪棹同君泛剡溪。

送公闢給事自青州致政歸吳中

公闢即程師孟

青瑣仙人解玉符秋風一夜滿江湖曾歌郢水非凡曲

未掃旄頭負壯圖

公昔北使憤然屢抑敵人

終日望君天欲盡平生

知我世應無扁舟應約元宮保瀟灑蓮涇二丈夫

按元宮保

即錢唐元章簡公絳蓋嘗寓居于蘇州

鄖陽道中

白馬春風綠草長行人踏破碧溪光隔山啼鳥自相應

臨水幽花應更香壠上驚飛青尾雉桑間閑立舊裙娘

白頭關吏還相問不信相如是故鄉

予去安陸二十六年矣

送石中允象之致仕歸新昌

鳳凰山下網羅疎，翠翮搖空去有餘。
陶令已拋彭澤印，謝敷今作會稽居。
碧峰四向晚吟處，啼鳥數聲春醉初。
更放魚舸鑑湖上，芙蓉香裏卧看書。

吳比部瑛致仕歸蘄陽

蘧公四十已知非，長揖公卿卧翠微。
結綬才還雙闕下，上書便乞故鄉歸。
伏轅赤驥相隨老，出網冥鴻自在飛。
應向黃梅訪逋客，白雲飄灑紫荷衣。

送宋屯田之湖南轉運判官

綠綬郎官笑白頭更攜龍節領諸侯
搏風初擊三千水投刃方排十二牛
行色未拋京洛地先聲已壓洞庭秋
漢家刺部官雖小一鑑寒氷照八州

送陳睦赴河中幕

紫皇初放第三膀中有英豪絕世無

君之先公與予先大夫同年登科

天廐本生騏驎子雲霄又得鳳凰雛

今君又取甲科

不須虎鬪

終全趙自是龍驤首破吳

廷試君本第一

雖作蓮花帳前客丹

臺到了姓名殊

南歸呈王樂道

漸少塵沙眼漸開
駸駸歸騎不須催
春風自過燕山好
寒色還從易水回
歸雁却飛天北去
白雲應傍日邊來
行行上苑花如綴
共獻君王萬壽杯

聞南陽呂諫議誨長逝

子文三仕去何頻
一卧南陽竟沒身
明主自應容直道
皇天何事殺忠臣
拄天力屈空留草
貫日心存不化塵

黃壤不知人世事為君慟哭楚江濱

哀蘇明允

豐城寶劍忽飛去玉匣靈蹤自此無天外已空丹鳳穴
世間還得二龍駒百年飄忽古無奈萬事凋零今已殊
惆悵西州文學老一丘空掩蜀山隅

傷賈老

世事一毫不掛眼放懷只用酒為年已從車後攜一榼
更向杖頭留百錢顧我曾傳丹鼎訣疑君便是紫芝仙

忽如蟬蛻不復見雨壞茅齋八九椽

樊秀才下第

平時愛子多集句此日金刀得剪裁
自謂羅中先得雋豈知天外已遺才
爐開遂失黃金鑛石劃猶藏白玉杯
獨倚西風倍惆悵却憂車馬到門來

張李二君獲薦喜而成篇兼簡岑令蔣掾

榜帖初傳見姓名喜來把讀繞欄行
長風又送二龍去二君俱嘗為解頭明月已看雙桂生
羣玉聚來俱是寶真金鍊

出始為精

省試七千人而解二君

雖知自是文章得須待秦臺寶

鑑明

勉學者

繞座羣書如累玉夜燈忘睡晝忘飢文章須用聖賢斷
議論要通今古疑孟子豈無仁義國荀卿猶作帝王師
太平岐路安於掌好跨大宛萬里馳

自貽

烏巾筇杖白雲夫寄謝黃公舊酒壚懶性惟看高士傳

歸心空展舊山圖
病來瘦骨支離在
老去懽情積漸無
啼鳥落花應怪問
綠塵何事滿金壺

衰疾

大夢為生固有涯
屢攻衰疾可驚嗟
時於耳竅嘯秋蚓
併向目睛飛黑花
門外掛羅同翟尉
座隅占鵬類長沙
予病輒有眼疾
支離猶食三鍾粟
買取湏溪好住家

山中桃花

春入關山亦未遲
亭蘿山下見西施
不羞白髮欺雙鬢

且對清尊挿一枝縱落不隨流水去儘開惟有白雲知
何須惆悵無人賞自有春風二月時

同賈運使昌衡章職方俞王推官輔之賞梅

花前留客解金鞍揀徧繁梢盡折殘翠帽挿來無處著
玉盤收取與人看無言有意空相對欲去重來更繞欄
把酒殷勤須會取風頭只待作春寒

雪中梅

臘雪欺梅飄玉塵早梅鬪巧雪中春更無俗艷能相雜

惟有清香可辨真姑射仙人冰作體秦家公主粉為身
素娥已自稱佳麗更作廣寒宮裏人

菊

寶釘萬數擁寒枝寂寞幽香蝶亦稀未把玉欄移得去
直須翠帽揷將歸定逢野客尋常折忍逐秋風取次飛
好佩一樽相就飲醉來從遣露霑衣

欽定四庫全書

鄮溪集卷二十八

宋 鄭獬 撰

五言絕句

齊山晚歸

飲散齊山晚夕陽
秋浦紅不須鞭五馬
十里聽松風

出都次南頓

駐馬綠陰下
離人正憶家
可憐桃李樹
猶有未開花

酴醾

清香無物敵粉葉自成圍白玉瓏璚髻真珠纓絡衣

題僧文瑩所居壁

西湖頻送客綠波舟楫輕春入蘿徑靜浪花翻遠晴

七言絕句

詠史

漢地龍蛇始遘迤曹公崛起定經綸陰謀用盡得天下
誰道彼雛解笑人

魏生被責灌將軍股慄如何不自陳若使當時有英氣

肯為丞相掃門人

漢家行賞盡論功禍福于人豈易窮解把舊恩酬項伯
獨將大義斬丁公

讀蜀志

曹公屈指當時輩天下英雄數使君髀肉消來還感泣
爭教漢鼎不三分

莊鷗辭海

初離安陸詩

歸路漸驚紅葉老舊山已落白雲深莊鷗聊欲辭滄海

越鳥終須憶故林

下第遊金明池

騎殺青都白玉麟歸來狂醉後池春人間得喪尋常事
不避郎君走馬塵

久泊餘杭關外水涸不能行晚雨甚快解舟有
日矣

初看紅芰小開頭今見青房結子稠深謝晚雲憐滯客
故飛涼雨送歸舟

畫屏

翠篠疎明臨晚水
紫葵點綴落晴沙
山雞對卧綠蒲葉
野鴨爭銜黃荇花

夷陵張仲孚願以荊州無山為戲輒書二絕

使君終日倚朱欄
綠樹高樓掩映間
自有碧江無限好
荊州佳境不須山

雨後飛雲冉冉回
碧天都似鏡初開
只應峽口多山處
不見秋光萬里來

再賦如山

小堂草草屋三間
暇日徜徉養壽閒
揭榜如山還自笑
何人不老似青山

客意

已換春衫別後衣
此心長共白雲飛
高堂壽酒年年事
趁取榴花及早歸

讀司馬君實撰呂獻可墓誌

一讀斯文泪漉襟
摩天直氣萬千尋
知君不獨悲忠義

又有兼憂天下心

讀李英公傳

李密被誅猶不負文皇顧命更何疑豈將當日奔亡後
比得當年富貴時

曉涼

銀河垂角斗星稀曉簾微涼夢破遲落月半庭人未起
好風搖動碧桐枝

三月

三月江南梅子青春遊已過畫船橫酒懷索寞人初倦
已喜金盃弄水聲

夜寒

欄干徙倚未能眠雲破初開碧玉天滿地雪花寒不掃
恨無明月對嬋娟

晚晴

漸覺沙頭碧草乾開簾更把晚雲看波光月色俱清絕
應有新花怯夜寒

雪晴

一抹明霞暗淡紅
瓦溝已見雪花溶
前山未放曉寒散
猶鎖白雲三兩峯

秋晴

雨洗秋空明似水
瓦光浮動碧差差
好風晴日虛窓淨
正是幽人養病時

塵埃

袖裏金鎚白氎袍
塵埃自古出英豪
胸中憤氣蟠不得

一夜虹蜺萬丈高

明月

一環明月午初停
自挂虛窓不可扃
恰見梧桐一雙影
綠陰漠漠覆中庭

聽泉

為愛飛泉灑雪涼
無緣移近曲欄傍
直須買斷清溪住
引取寒聲繞卧床

湖上

湖山只合住真僊家在鄖溪未有緣
欲把金錢三百萬萬松嶺上買雲眠

採江

江上雲亭霽景鮮畫屏展盡一山川
遲遲欲去猶回首目盡孤烟白鳥邊

江行五絕

馬當之西絕險處青山獨出無四鄰
且繫畫船楓樹下行人去賽小姑神

三日禁船官不容波如連屋萬千重莫向長江爭道路
如今風雨屬蛟龍

清明村落自相過小婦簪花分外多更待山頭明月上
相招去踏竹枝歌

快帆美滿送船去忽值高沙船不行只道今朝風色好
不知還有暗灘生

西江廟前飛來鳥紫金作翅尾畢逋翻空趁船接紅果
銜去却哺林中雛

觀濤

怒濤沃日為之陰下有蛟龍不測深若比人間惡風浪
長江風浪本無心

水淺舟滯解悶十絕

聞道春流下斗門扁舟應得解南村欲看竹箭開新漲
更挿楊枝記舊痕

正愛春波妥妥長微吟倚棹落花傍狂風忽送蛟龍雨
翻動一天星斗光

柳枝拂水萬千縷水去柳枝還却回不似桃花愛飄蕩
等閒流出碧溪來

壩上春流滑滑來行人相語笑相催解舟直入碧天去
天上晚雲行處開

小鳥羣飛獨木陰笑聲騷屑如鳴琴見人接翅却飛去
還入前村楓樹林

稚子持竿坐芳草魚兒跋尾出浮萍會稽巨塘沉猶脫
滄海驪龍睡不醒

酒徒不復少年時
白髮狂歌亦未衰
更與春風酬一醉
好花猶有兩三枝

青天萬里放醉眼
啼鳥一聲傷客心
攜手尋春春盡日
此時真直萬黃金

春水駸駸抹舊痕
兒童乘浪戲青雲
去如跳鯉忽驚散
來似遊鳬還作羣

斗城縹緲浮雲裏
歸路坡陀碧草斜
北極已看龍虎氣
神州漸近帝王家

登第後作

文闈數戰奪先鋒
變化須知自古同
霹靂一聲從地起
到頭身是白雲翁

公病中嘗夢浴玉龍池
驚見體生鱗角而寤

探花

粉蓓團梢相並開
醉中走馬探花回
春衫不惜露痕污
直入鬧花深處來

上朝

秋風御路冠蓋滿
曉月畫樓鐘鼓遲
卧聽傳呼丞相入

可憐正是上朝時

翰林夜直

名草富
丞相制

中使傳宣學士家君王令草侍中麻紫泥金印才封了
蓮燭燃殘一寸花

夜宿秘閣

金馬藏書大帝家繞簷鳴玉滴水牙晚雲不動寒風斷
殘雪時飛三兩花

乞郡

曉日銀臺再上書相君何日奏丹塗紫皇有意憐衰老
乞與揚州第五符

省中栽花

凌晨上馬晚方回不省好花開未開誰把金錢買花樹
帶將春色入城來

試院中懷公達

黃衫自掌貢闈瑣強刷塵心酒一杯天上謫仙如見憶
可能騎取老鯨來

被恩出使

鏡湖清淺越山寒，好倚秋雲刮眼看。
萬里塵沙卷飛雪，

却持漢節使呼韓。

予時求會稽郡

出北關

去年此地送行客，俯仰之間迹已陳。
今日復來相別處，使君却是北歸人。

過十丈山

慣向長安事朝謁，滿衫塵土厚於泥。
行人若愛青山好，

何不暫時留馬蹄

白雲道中

翠壁連環三百里行人不奈愛山何
莫辭下馬尋雲逕前到淮西塵已多

過三十六洞

草深樹密不見溪但聞地底溪聲迴
忽從山口渡流水始知此溪山北來

蒼山連環不斷頭溪聲繞山無時休
後溪已穿綠樹去

前溪却向山前流

高溪却瀉低溪水溪裏分明見白沙
夜來山上暴風雨
溪口流出紅桃花

離蔡州

風吹醉面出南州兩行紅裙立馬頭
已過落花時節晚
不須再拜苦相留

離雲中一首

南歸喜氣滿東風草軟沙平馬足鬆
料得家人相聚說

也知今日發雲中

漢使離北庭常限正月四日

入涿州

飲馬桑乾流水渾燕山未晚已黃昏
衣襟猶帶長安酒不分江湖浣舊痕

回至涿州

來時正犯長安雪今見春風入塞初
為問行人多少喜燕山南畔得家書

五松山

李白嘗遊此今有寶雲寺

天上仙人謫世間
醉中偏愛五松山
錦袍已跨鯨魚去
惟有山僧自往還

秦淮

秦氏無過一再傳
欲圖萬里據秦川
漢家只在芒山下
却謂金陵五百年

四海龍蛇日沸騰
秦皇萬世欲相承
漢家王氣芒山起
却事東巡鑿秣陵

淮上

桐栢山中草木靈淮源滴滴繞山鳴誰人鑿出渾河水
污却長波萬丈清

車蓋飛雲不放船長疑水府貯神仙淮靈須信疎慵甚
欲住荊州不計年

自天竺遇雨却回靈隱

月桂峯前快雨飛林間避雨亦沾衣才晴便出西山路
却共斷雲相趁歸

舟行次南都遇雨

雨聲飄斷忽南去雲勢旋生從北流
料得涼風消息近蕭蕭只在柳稍頭

老火燒空未易收忽驚快雨破新秋
晚雲濃淡落日下已似楚江南岸頭

自靈隱回謁孤山勤上人

獵獵長松十里風歸時路與北山通
陶潛今日無餘事更過虎溪尋遠公

贈冲雅師

善草書

姑孰上人溪上居碧松搖雨晚涼初誰將六角竹枝扇
來問羲之覓草書

赤壁

帳前斫案決大議赤壁火船燒戰旗若使曹公忠漢室
周郎爭敢破王師

早起

頭疼宿酒未能解獨怕曉寒簾捲遲懊恨桃花愛飄蕩
夜來壓折海棠枝

送禪雅歸姑蘇

秋風江上白雲飛
江氣飄蕭欲灑衣
正是荷花滿吳國
詩人靈徹故山歸

嘲范蠡

千重越甲夜成圍
宴罷君王醉不知
若論破吳功第一
黃金只合鑄西施

湖上晚歸

江梅向臘雪初飛
莫向花前酒數稀
為報玉堂批詔客

夜來乘月北山歸

柳湖晚歸

碧天寫入柳湖底
天上醉遊春日斜
便留畫舫入城去
不忍馬蹄踏落花

舟中睡起

銅盤綠水浸紅蕖
風卷紗幮睡足初
金殿故人如借問
為言病酒嬾修書

重到城東有感三首

曾訪花翁醉玉壺重來花下盡平蕪東風繞袖應相識
記得當年舊酒徒

好春初滿杏園花十里曾携載酒車今日黃雲衰草地

不堪更送賈長沙

李子思謫官又
於此相別也

仙桃移在玉欄初紅抹臙脂嫩點酥聞道飄零落人世
清香得似舊時無

逢賈老

買得虛名東路歸自憐鷗鳥本忘機吾師不用苦迎送

亦是當時一布衣

贈徐登先生

鬢髮如鰲眼正青鍊來玉骨已通靈我來欲問金丹訣

三日林間醉不醒

柳湖席上呈夏宮苑

千條萬條楊柳絲好花不過三兩枝

淮陽多壯丹然奇絕者每圓不過數

枝今日樽前為君飲明朝酒病終不辭

阻風遊銅陵護法寺

白浪浮江打白沙江頭綠竹對僧家春風也似玉京好
一樹殘紅山杏花

正夫草卷已就余例亦奏牘今得絕筆

琳琅之寶出荆山合作珪璋與佩環楚澤白茅最微陋
何緣亦在貢書間

送王殿直

玉尺新裁白紵衣楊花紛泊滿衫飛少年不怕風塵惡
污却鄆泥走馬歸

一尊聊寄洞元師
既到山中春未遲
料得醉眠巖石上
曉風零落小桃枝

洞元道士酒中仙
散髮人間五十年
醉後不知山月上
竹間橫枕一琴眠

送曉容

龐眉蒼面已衰翁
猶踏天衢塵土中
收得閒名好歸去
鮮魚白酒醉秋風

寄郭祥正

天門翠色未饒雲姑孰波光欲奪春怪得溪山不寂寞
江南又有謫仙人

寄題峽州宜都縣古亭

古人已逐秋草沒明月空隨秋浪翻安得古人似明月
長來此地對金罇

戲言寄雪溪使君唐司勳

水精宮殿從來小

雪上號
水精宮

寂寞蓬萊不可遊

會稽號
小蓬萊

十

萬人家明鏡裏神仙都會是杭州

出金陵却寄蔣山元師

不及林間紅鶴羣飛泉却得夜深聞風帆又絕秦淮去
回望北山空白雲

招余補之

赤泥圓印木蘭酒欲飲無人共把杯只隔春江一潮信
可能閒訪故人來

憶南中兄弟

河上青青榆葉稀湘童何日報南歸可嗟不及衡陽雁

兄弟相將作隊飛

遺興勉友人

人生三萬六千日二萬日中愁苦身惟有無心消遣得
有心到了是癡人

傷王霽

欲鍊此心成古鏡清光直透太虛明朝來一灑故人淚
依舊塵埃滿匣生

稚子

稚子誰憐衰病餘
戲殘鬪草繞庭除
朝來竟學黃家畫
畫破新傳幾本書

田家

數畝低田流水渾
一樹高花明遠村
雲陰拂暑風光好
却將微雨送黃昏

汪正夫為人撰墓誌有中金之贈因以二絕戲之

飄然才思是真仙
鳳字仍留碧玉鐫
換得黃金滿書篋

可能獨具買山錢

寶字奇文刻夜臺黃金論價未當才諸生可是無豪氣
不就韓公乞取來

病中

丞相新詩懶未酬一編藥錄在牀頭何時病骨健於鶻
直與秋風萬里遊

病來翻喜此身閒心在浮雲去住間休問遊人春早晚
花開花落不相關

謝病

自緣謝病慙朝紱
漸有心期訪舊廬
為問桃花巖下客
有田肯貰子真無

昔日

昔日揮毫多壯思
半天拂下鳳凰兒
夜來雪灑松窓急
開卷先逢白髮詩

藍橋送客回謁張郎中

都無歌管伴金杯
草草藍橋送客回
寒雨飄零不成雪

剡溪閒訪戴逵來

酬公達

小吏扣關聲啄啄山夫驚落手中杯不知天上何緣到
袖裏攜將明月來

哭重伋兼穰令

古劍沉來不可尋白沙堆下葬黃金憑君莫向大江哭
泪入黃泉寃更深

自嘲

金瓶梅詞話卷二十一
樂府休翻白苧歌樽前已怯卷紅螺壯心雖欲未伏老
爭奈秋來白髮何

嘗酒

病髮搔來不滿簪一樽聊復灑煩襟只應從此歡心減
不及年年酒味深

飲醉

小鍾連罰十玻璃醉倒南軒爛似泥睡起不知人已散
斜陽猶在杏花西

巽亭小飲

花開花落何須問
勸爾東風酒一杯
世事正如滄海水
早潮才去晚潮來

酒寄通州吳先生

往年醉倒先生家
今寄綠酒滄海涯
此酒到時春已晚
猶應趁得賞殘花

酒寄郭祥正

第一荊州白玉泉
蘭舟載與酒中仙
却須捉住鯨魚尾

恐怕醉來騎上天

次韻程丞相觀牡丹

滿車桂酒爛金醅
坐繞春叢醉即回
爭得此花長在眼
一朝只放一枝開

碧涼繖下罩羅敷
只恐晴暉透錦襦
醉倚玉欄問春色
此花勝得洛中無

第一名花落下開馬
馱金餅買將回
西施自是越溪女

却為吳王賺得來

陳人常賣金就洛中市
花一圓或至千餘緡

絲頭黃芍藥

揚州絕格已為稀
北土花翁載得歸
白玉圓盤圍一尺
滿堆金縷淡黃衣

招同僚賞雙頭荷花

為愛荷花並蒂開
便將荷葉作金杯
桃根桃葉俱殊色
且看相携渡水來

酬張仲巽見督龍山之遊

渚宮曾燕菊千枝
落日須將急棧追
料得山花也相愛

使君來晚不嫌遲

倒尊擲帽愧新詩
後日歡遊亦可追
自是東風多逸興
不關南郡出遊遲

梁天機約重陽見訪而汪正夫簡報書齋叢菊
輒有小藥因書一絕呈正夫

簡報菊叢生小藥枝頭應似撥
冰醅故人有信來相訪
好祝秋風及早開

重九後見新菊

年年時節菊初開
滿插花枝倒酒杯
今日秋風欺病客
惟將白髮上頭來

江梅

杭州別乘有餘才
戲作佳篇寄我來
已教吳娘學新曲
鳳山亭下賞江梅

雪裏梅

武皇未識長卿才
多向吳王故國來
誰見江南佳賞處
月中詞客雪中梅

和汪正夫梅

少陵老杜獨憐才
長句還如鐵馬來
酒味漸佳春漸好
苦教陸凱詠寒梅

世上庸兒苦忌才
脫身曾把虎鬚來
他年若隱吳門去
從此真仙不姓梅

江南江北謫仙才
為愛湖山特地來
願得春寒過三月
尊前留得臘前梅

禁林自笑老無才
覓得杭州刺史來
飲散憑欄却怱悵

不堪憶著故園梅

好花賦與本天才料得靈根天上來應為長安惡風土
故教北地不栽梅

妖花爛熳敵清才鄴騎還驚寶玦來鄭國枉教蘭作佩
定應不識楚江梅

座中豪客洛陽才醉舞春風拂袖來明日却尋歌管地
中庭空有折殘梅

麗賦多傳楚客才新詩還自楚江來雪痕未漲龍池水

風信先飛庾嶺梅

探花最費庾郎才
欲把瑯盤折取來
不奈雪花苦相誤
梢頭無處認真梅

詩入雞林白傅才
當年曾佩左符來
尊前依舊江山好
不見章臺驛使梅

劉蕢直氣壓羣才
却束塵衣取次來
開府剛腸破金石
可能刻意賦寒梅

欲酬彊韻若為才
昨夜歸時趁月來
寂寞後堂初醉起

金盆猶浸數枝梅

好花有意似憐才
時泛清香入袂來
待得繁梢都結實
莫將細核比楊梅

流俗休教見美才
不如長入醉鄉來
江南蚤是多風雨
莫向花前唱落梅

江南還有謝娘才
試數春期幾日來
綵勝未隨釵上燕
玉臺先插鬢邊梅

木禿風摧正為才
幾將擠陷九淵來
見君說著須酸鼻

何必尊前更食梅

窮通繫命不由才富貴偏宜老後來
花草猶教有先後
憑君試看北枝梅

姑射仙人冰作體秦家公主粉為身
素娥自己稱佳麗
更作廣寒宮裏人

落梅

醉墨紛紛盡雅才等閒携酒探花來
笙歌已散遊人去
更逐東風拾落梅

竹

經時不到紫雲溪
新筍攔斑青玉枝
生怪南山惡風雨
夜來長得碧龍兒

冰骨清疎綠玉君
連環高節粉花紋
截來好作仙翁帚
獨倚扶桑掃白雲

鸞節朝元昨日歸
玲瓏玉佩解雲衣
幾多碧玉鳳凰尾
鬪向秋烟不肯飛

鷺鷥

小屏飛鷺雪
離襟窓影初
搖晚竹枝獨倚枕函無一事
無何鄉裏覺來時

食魚憶新開湖

柳條穿頰一雙鯉
鱗插金錢腰尾長
何日酒泉飛白浪
湖邊先問把罾郎

曾擊畫船湖北樹
船家新撇白醪醕
紫荷蓋下黃金尺
只就罾頭買得來

頃年嘗與董伯孫數子獵兔抵馬欄
今日重來

解鞍佛舍見高儀之題云躍馬飛鵲至此追念
疇昔因紀一絕兼呈儀之

昔年嘗臂海東鵲醉客高飛鐵馬羣今日見君題壁處
自憐曾是舊將軍

浚溝廟蜥蜴

或云能知風雨

不歸大海不藏山碧瓦朱欄綠樹閑應待老龍纔睡著
便偷雲雨落人間

雨雪雜下

雨鬪雪聲相雜下飄蕭密勢灑空來北風有意待寒臍
只放飛花一半開

楚江雲暖凍未得雪粒飄來著地稀恰似小園寒食後
梨花零亂雨中飛

詞

初春

好事近

江上探春回正值早梅時節雨行小槽雙鳳按涼州初
徹謝娘扶下繡鞍來紅靴踏殘雪歸去不須銀燭有

山頭明月

長短句

雞冠

蜀山雞啄我黍吳童截其冠持之埋在土西風吹得一
枝生莢向秋烟飛不去

蓼花

蓼花開如赤組誰織成銀漢女黃金機白玉杼費盡朝
霞千萬縷

佚句附

東飛江雲北飛燕同寄青春不相見
夜來過嶺忽聞雨今日滿溪俱是花

